


唐五十家詩集



明銅活字本

唐五十家詩集
四

上海古籍出版社


高常侍集



高常侍集卷第一

賦

東征賦



歲在甲申秋窮季月高子遊梁既久方適楚
以超忽望君門之悠哉微先容以効拙姑不
隱而不仕宜其漂淪而播越出東苑而遂行
沿濁河而茲始感隋皇之敗德劃平原而爲
此西馳洛汭東並淮涑地豁山開川流波委
六宮景從千官運迤龍舟錦帆照耀乎數千

百里大駕將去群盜日起尸祿者卷舌而偷
生直諫者解頤而後死寄腹心於梟獍任手
足於蛇虺既垂絀於匹夫尚興疑於愛子豈
不以爲窮力役於征戰務滛逸於奢侈六軍
悲牧野之師萬姓哭遼陽之鬼嗟顛覆於曩
日指年代於流水唯見長亭之煙火曠野之
荆杞至鄴縣之舊邑懷蕭相之高風旣屈節
於主吏每歸誠於沛公始俱起於天下乃從
定於關中推金帛於他人挹圖籍於我躬按

山川之險阻救天地之屯蒙嘉盈俸以增邑
方指蹤而建功納邵平以防患舉曹參而告
終經洛城而永望想譙郡而銷憂慨魏武之
雄圖終大濟於橫流用兵戈以威四海挾天
子而令諸侯乃擅命以誅伏徒矯跡以安劉
吾始未知夫順逆胡寧比德於殷周下符離
之西偏臨彭城之高岸連山鬱其漭蕩大澤
平乎渺漫昔天未厭禍項氏叛渙解齊歸楚
自蕭擊漢天地無色風塵潰亂悶君王之軾

軻混士卒以奔散苟炎運之克昌豈生人之
塗炭次靈壁之逆旅面垓下之遺墟嗟魯公
之慷慨聞楚聲而悵於歌拔山以涕洟竊霸
圖而莫居擯亞父之何甚悲虞姬之有餘出
重圍以狼狽至陰陵以躊躇顧天亡以自負
雖身死兮焉如登夏丘而寓目對蒲隧而愁
予問取慮之斯在微長直之捨諸宿徐縣之
廻津惟偃王之舊域方以小而事大豈無位
而有德彼皆昏暴以喪邦伊何仁義而亡國

高延陵之掛劒慕班彪之述職緬沛水之悠
悠俯婁林之紆直即日河澣依然泗上山川
土田耳目清曠眺淮源之呀豁偉楚關之雄
壯掛輕席於中流順長風以破浪過盱眙之
邑屋傷義帝之波蕩歎三尸之亡秦知萬人
以離項越龜山而訪泊入漁浦而待潮鴻鴈
飛兮木葉下楚歌悲兮雨蕭蕭霜封野樹冰
凍寒苗岼草無色蘆花自飄幸息肩於人事
願投跡於漁樵思魏闕而天遠向秦川而路

遙候鳴鷄以進帆趨亂流以爭迅縱孤舟於
浩大撫垂堂以誠慎遵枉渚於淮陰徵昔人
於韓信哀王孫之寄食嘉漂母之無愠鄙亭
長之不仁乃晨炊而嗇恡忽從龍以獲騁遂
擒豹以自奮破全趙而用奇稱假齊而益振
幸辭通以感惠俄結狶而謀釁當在約而必
亨曷持盈而不順凌赤岸之迢遞掉白波之
紆餘歷山陽之村墅挹襄鄆之邑居人多嗜
艾俗喜觀漁連葭葦於郊甸雜汀洲於里閭

感百川之朝宗彌結念於歸歟日杲杲以麗
天雲飄飄以卷舒魯放情於蹈海丘未歎於
乘桴遇坎則止吾今不知其所如者哉

奉和鵲賦 并序

天寶初有自滑臺奉太守李公鵲賦以垂示
適越在草野才無能爲尚懷知音遂作鵲賦
其詞曰

夫何鵲之爲用置之則已縱之無匹懷果斷
之沉潛任性情之敏疾頭小而銳氣雄而逸

貌耿介以凌霜目精明而點漆想像邈遠孤
貞深密將必取而乃廻若授詞而勿失當白
帝之用事入青雲而委質乃徇節以勃然因
指蹤而挺出嚴冬欲雪蔓草初焚野莽蕩而
風緊天崢嶸而日曛忿顧兔之狡伏耻高鳥
之成群始滅沒以略地忽升騰而參雲翻決
烈以電掣皆披靡而星分奔走者折脇而絕
脰鳴噪者血灑而毛紛雖百中之自我終一
呼而在君夫其左右更進縱橫發迹掃窟穴

之凌兢振荆榛之浙瀝翕六翮以直上交雙
指以迅擊合連弩之應機類鳴髀之破鎗豁
爾胷臆伊何凌厲以爽朗曾莫薑介豈虞險
艱而怵惕觀其所獲多有得用非媒歷閭闔
以肅穆翊鈎陳而環回幸輝光於蒐狩承剪
拂於樓臺望鳳沼而輕舉紛羽族之驚猜路
杳杳而何向雲茫茫而不開鶯出谷兮徒爾
鶴乘軒而何哉彼懷毅勇輶軻而棄置胡不
効其間關而徘徊爾乃顧恩有地戀主多情

念層空而不起託虛室以無驚雅節表於能
讓義心激於效誠勢逾高而下急體彌重而
飛輕戢羽翼以受命若肝膽之必呈嗟日月
之云邁猶羈縻而見嬰別有橫大海而遙度
順長風而一寫投足耻於巖巔脫身免於弋
者冰落落以凝閉雪皚皚而飄灑諒堅銳之
特然寧苦寒以求捨匪聚食以祈滿聊擊鮮
以自假比玄豹之潛形同幽人之在野矧其
升巢絕壁獨立危條心倏忽於萬里思超遙

於九霄豈別物之能暴曷凡禽之見邀則未
知鴛鴦之所適孰與夫鵬鷖兮逍遙云爾哉
五言古詩

宋中十首

梁王昔全盛賓客復多才悠悠一千年陳跡
唯高臺寂寞向秋草悲風千里來

朝臨孟諸上忽見芒碭間赤帝終已矣白雲
長不還時清更何有禾黍偏空山

景公德何廣臨變莫能欺三請皆不忍妖星

終自移君心本如此天道豈無知

梁苑白日暮梁山秋草時君王不可見修竹
令人悲九月桑葉盡寒風鳴樹枝

登高臨舊國懷古對窮秋落日鴻鴈度寒城
砧杵愁昔賢不復有行矣莫淹留

出門望終古獨立悲且歌憶昔魯仲尼悽悽
此經過衆人不可向伐樹將如何

逍遙漆園吏冥冥不知年世事浮雲外閑居
大道邊古來同一馬今我亦忘筌

五霸並征伐宋人無戰功解圍幸奇說易子
傷吾衷唯見盧門外蕭條多轉蓬

常愛宓子賤鳴琴能自親邑中靜無事豈不
由其身何意千年後寂寥無此人

閼伯去已久高丘臨道傍人皆有兄弟爾獨
爲參商終古猶如此而人安可量

薊中作

策馬自沙漠長驅登塞垣邊城何蕭條白日
黃雲昏一到征戰處每愁胡虜翻豈無安邊

書諸將已承恩惆悵孫吳事歸來獨閉門

睢陽酬別暢大判官

吾友遇知己策名逢聖朝高才擅白雪逸翰
懷青霄承詔選嘉兵慨然即馳軺清晝下公
館尺書忽相邀留歡惜別離畢景駐行鑣言
及沙漠事益令胡馬驕丈夫拔東蕃聲冠霍
嫖姚兜鍪衝矢石鐵甲生風颭諸將出井陘
連營濟石橋酋豪盡俘馘子弟輸征徭邊庭
絕刁斗戰地成漁樵榆關夜不扃塞口長蕭